



Artaxerxes ayant permis à Nehemie son Eschanfon de rebastir la ville de Ierusalem, & le Temple; les Iuifs bastissent d'un main, & tiennent l'espée de l'autre.

NEHemie fils d'Helchias estant Eschanfon du Roy Artaxerxes, impetra du Roy permission à ce que les Iuifs pussent rebastir la ville & Temple de Ierusalem, qui auoient esté ruinez lors que le peuple d'Israël fut emmené captif en Babylone, & obtint des lettres adressantes à Asaph garde de la forest du Roy, afin qu'il luy donnast du bois, & qu'il peust courir les portes du Temple, les tours, les maisons, & la muraille de la cité. Doncques les Iuifs commencerent à edifier & reparer les vieilles ruines; mais il aduint qu'un nommé Sanaballat, ayant entendu que les Iuifs edifioient la muraille, en fut fort courroucé, & voulut empescher leur entreprise & ouurage; il fut assisté de Tobias Ammanite, des Arabiens, des Ammanites, & des habitans d'Azoron, lesquels furent fort irritez quand ils ouyrent que la breche de la muraille de Ierusalem estoit r'habillé, & s'assemblerent tous ensemble pour venir combattre contre Ierusalem, & pour faire aucunes trahisons. Lors les Iuifs prièrent le Seigneur, & constituerent gardes sur la muraille iour & nuict contre eux, & ordonnerent au lieu derriere la muraille à l'entour, le peuple par ordonnance, avec leurs espées & lances, & leurs arcs. Puis apres Dieu ayant dissipé le conseil de leurs ennemis, tous retournerent aux murailles chacun à son ouurage. Et il aduint depuis ce iour-là, que la moitié de leurs iouuenceaux faisoient l'œuure, & l'autre moitié estoit preparée à la bataille, & chacun faisoit l'ouurage d'une main, & de l'autre tenoit l'espée, de laquelle chacun des edifiens estoit ceint sur ses reins: & en cette sorte la ville & le Temple furent reedifiez au grand contentement de tout le peuple d'Israël. 2. d'Esdras Chap. 2. 4. & 7.